

Ukuaji wa Kiroho Kupitia Huduma

Wapeni watu vitu, nanyi mtapewa; kipimo cha kujaa na kushindiliwa, na kusukwa-sukwa bata kumwagika, ndicho watu watakachowapa vifuani mweni. Kwa kuwa kipimo kile kile mpimacho ndicho mtakachopimiwa—Luka 6:38.

Wale wanaotoa maisha yao kwa ajili ya huduma kama ya Kristo wanajua maana ya furaha ya kweli. Mapenzi na maombi yao huenda mbali zaidi ya nafsi. Wao wenyewe wanakua wanapokuwa wakijaribu kuwasaidia wengine. Wanaifahamu mipango mikubwa mno, mambo ya kisisimua zaidi na wanaweza kufanya nini zaidi ya kukua wanapojiweka wenyewe katika mkondo wa Mungu wa nuru na baraka? Hao wanapokea hekima kutoka mbinguni. Wanafunganishwa na Yesu zaidi na zaidi katika mipango Yake yote. Hakuna nafasi kwa ajili ya udumavu wa kiroho. Shauku binafsi na uchoyo hukemewa kwa kukabiliana daima na maslahi yadhoofishayo, shauku ya juu iadilishayo, ambayo ni masuala ya juu na matakatifu (*Testimonies for the Church 9:42*).

Jamii ya mbinguni inasubiri kushirikiana na mawakala wa kibinadamu, ili kwamba waweze kuonesha kwa ulimwengu kile ambacho mwanadamu anaweza kuwa na ambacho, kwa njia ya mvuto wao, wanaweza kufanikisha kwa ajili ya kuokoa roho ambazo zinakaribia kuangamia. Yeye ambaye ameongoka kweli kweli atajazwa na upendo wa Mungu kiasi kwamba atatamani kutoa kwa wengine furaha ambayo yeye mwenyewe anayo.

Bwana anatamani kanisa Lake lioneshe kwa ulimwengu uzuri wa utakatifu Wake. Linapaswa kudhihirisha nguvu ya dini ya Kristo. Wimbo wa shukrani na sifa unapaswa kusikiwa na wale walio gizani. Kwa maana kwa Habari njema ya injili, kwa ahadi na uthibitisho wake, tunapaswa kuonesha shukrani kwa kuwafanyia wengine mema. Kuifanya kazi hii kutaleta miale ya haki ya mbinguni kwa roho zilizochoshwa, fadhaishwa na kuteseka. Ni kama chemchemi iliyofunguliwa kwa ajili ya wasafiri wenye kiu na waliochoshwa na safari. Malaika wa Mungu wapo katika kila kazi ya huruma na kila kazi ya upendo.

Kazi ya Yesu inapaswa kuwa kielelezo chetu. Alizunguka kote akitenda mema. Yesu alihubiri injili na kuponya wagonjwa katika Hekalu na Sinagogi, katika mitaa ya miji, katika masoko na karakanani, ufukweni na milimani. Maisha Yake yalikuwa yale ya huduma isiyo na ubinafsi na inapaswa kuwa kitabu chetu cha mafunzo. Upendo Wake unaojali na uliojawa na huruma hukemea ubinafsi na kutokuwa na huruma kwetu.

Popote Yesu alipokwenda, Alisambaza baraka njiani Mwake. Ni wangapi wanaodai kumwamini wamejifunza mafundisho Yake ya wema, huruma na upendo usio na ubinafsi? Sikia sauti Yake akiongea kwa wanyonge, waliochoka na wasiojiweza: "Njoni kwangu, ninyi nyote msumbukao na wenye kulemewa na mizigo, nami nitawapumzisha" (*Mathayo 11:28*). Hakukuwa na kuchoka kwa subira Yake wala kuzimishwa kwa upendo Wake (*Testimonies for the Church 9:30, 31*).